

## Peqqussutissatut siunnersuummut oqaaseqaatit

**Nalinginnaasumik oqaaseqaatit**1. Aallarniut:

Piginnaanngorsaaqqinneq pillugu aaqqissuussinerup kommuninit tamakkiisumik atorneqarnissaa pillugu kissaatigisaq tunngavigalugu Piginnaanngorsaaqqinnissamut ikiorsiisarneq pillugu Inatsisartut peqqussutaat nr. 4, 31. maj 2001-imeersup allanngortinnissaa pillugu Inatsisartut peqqussutissaattut siunnersuut saqqummiunneqarpoq. Tamatuma malitsigisaatut pilersaarutigineqarpoq suliffeqarfimmi piginnaanngorsaaqqinnermi akissarsianut tapiissutit, piginnaanngorsaaqqinnermi pilersaarut, piginnaanngorsaaqqinnermi ikiorsiissutit aammalu eqaannerusumik suliffeqarneq pillugit nutaamik nalunaarutissatut siunnersuummik saqqummiussisoqassasoq. Matumani nalunaarut tunngavisseeqataassaaq suliffeqarfimmi piginnaanngorsaaqqinnermi akissarsianut tapiissutit aamma piginnaanngorsaaqqinnermi ikiorsiissutit pillugit allaffisornikkut aqutsinerup pisariinnerusumik ingerlanneqarsinnaalernissaannut.

Piginnaanngorsaaqqinnermi suliniutit suliffeqarnermi suliniutigisanut allanut ataqatigiissinneqartariaqarput, tamatumani pineqartut qitiusumik soorluttaarlu najukkami ingerlanneqarpata. Taamaattumik orniginartuuvoq kommunit taamatut suliniutigisagarneq sumiiffigisaminni suliffeqarnikkut suliniutiginiakkanut allanut akuliutititsiniarsinnaanissaat.

Tassunga atatillugu naatsorsuutigineqarpoq piginnaanngorsaaqqinnermi suliniarneq ilitsersuisartunik ilinniartitaanermi ilinniagaqartitseqqittarnermilu ingerlanneqareersunut pilersaarutigineqartunullu atatillugu ilinniartitaanikkut suliniutigineqartunut aamma iluaqutaasinnaassasoq, tamatumani inuit ataasiakkaat pillugit iliuuserisassanik pilersaarusiorsinnaasarnissanut sanilliullugu piginnaasaqarnerulersitsisoqassammat. Pineqartut piginnaanngorsaaqqinnermi suliniarnermut pingaaruteqartuupput. Inuillu ataasiakkaat pillugit iliuuserisassanik pilersaarutit pineqartut suliarineqartarnissaannut atatillugu iluaqutaalluarsinnaasassagaluarpoq tamanna kommunini suliffeqarnermut- aamma isumaginninnermut ingerlatsiviit akornanni suleqatigiittoqartarneratigut pippat. Taamatuttaaq taamatut suliniarneq najukkani sulisitsisut suleqatigalugit pisussaasariaqassaaq.

Kommuninit avinngarusimasuniittunit arlalinnit taaneqartarpoq piginnaanngorsaaqqinnermi aaqqissuusseriaaseq atuutilersitsivigissallugu ajornakusoorsinnaasartuq kommunini pineqartuni suliffissat amigaataasarnerat

pissutigalugu. Taamatut ajornartorsiuteqartoqartarnera ilaatigut ikiorserneqarsinnaasassajunnarsivoq aalajangersimasunik iliuuseqartoqarneratigut. Tamannalu ilaatigut pisinnaasassaaq kommunit misilittagarisatik pillugit akunnerminni paarlaasseqatigiittarnerisigut, tamatumani ilanngullugit "suleriesartakkat pitsaanerpaat", isumassarsianik katersuiffiit allatigulluunniit attaveqatigiiffiusinnaasut aqutigisinnaasarnerisigut.

## 2. Siunnersuummi immikkoortut pingaarnerit pillugit nassuiaat:

Piginnaangorsaaqqinneq pillugu inatsisitigut ullumikkut tunngavigisaq tassaavoq Piginnaangorsaaqqinnissamut ikiorsiisarneq pillugu Inatsisartut peqqussutaat nr. 4, 31. maj 2001-imeersoq. Peqqussut atuuttoq allanngortinneqassaaq, taamaasilluni aqqissuussineq pineqartoq kommuninut suliffeqarfinnullu pisariinnerusumik aqutsiviusinnaalersillugu.

Piginnaangorsaaqqittussap aqqissuussarisatigut periarfissarisinnaasassai siunnersuut malillugu annertusineqassapput, taamaasilluni piginnaangorsaaqqittussaq piffiup piginnaangorsaaqqiffiusup iluani ilinniagaqarsinnaanissamik aamma periarfissaqalissammat, tamatumani ilaalluni ilinniagaqaaqqissinnaanissaq. Suliamut allamut ilinniarsinnaaneq aalajangersagaq ullumikkut atuuttoq malillugu periarfissaanngilaq.

Taamatuttaaq piginnaangorsaaqqittut tamarmik sungiusarneqarnissamik imaluunniit ilinniagaqarnissamik neqeroorfigineqarsinnaanissamik periarfissinneqassapput. Suliffeqarfimmi piginnaangorsaaqqinnermi akissarsianut tapiissutisisoqarsinnaanissaanut pissutsit immikkut ittut atuuteqqaartariaqarnerat immikkut piumasaqaataajunnaassaaq. Taamatuttaaq aamma piumasaqaataajunnaassaaq piginnaangorsaaqqittup suliffeqarnermut siusinnerusukkut attuumassuteqareersimanissaa, imaluunniit apparisamik qitornarisanilluunniit pilersuisuunissamik pisussaaffeqartinneqaaqarnissaa. Inuit suliffeqarnermut attuumassuteqarsimanngitsut imaluunniit apparisamik qitornarisanilluunniit pilersuinissaminnik pisussaatinneqanngitsut suliffeqarfimmi piginnaangorsaaqqinnissamik neqeroorfigineqarsinnaanermik aalajangersagaq ullumikkut atuuttoq malillugu periarfissaqartinneqanngillat.

Taamatuttaaq siunnersuut malillugu siunertarineqarpoq piginnaangorsaaqqinnissamut piffissaliussaq ukiunut marlunnut sivikillineqassasoq. Aalajangersagaq ullumikkut atuuttoq malillugu piginnaangorsaaqqittoqarsinnaavoq ukiut tallimat angullugit.

Inatsisartut piginnaangorsaaqqinnissamut ikiorsiisarneq pillugu peqqussutissatut siunnersuutaat inatsisilianut allanut arlalinnut attuumassuteqarpoq:

Inatsisartut pisortanit ikiorsiissutit pillugit peqqussutaat, Inatsisartut pisortanit soraarnerussutisiat pillugit peqqussutaat aammalu Inatsisartut suliffissaaleqisunik sulisitsiniartarneq pillugu peqqussutaat, kiisalu Inatsisartut suliffeqanngikkallarnermi ikiorsiissutit pillugit peqqussutigiligassaat.

Peqqussut matumani pineqartoq peqqussutilianut matuma siuliini taaneqartunut naapertuuppoq, taamaattumillu inuit sulisinnaassuseqartutut ukiullit amerlanersaasa suliffeqarnermiiginnarsinnaanissaannik imaluunniit uterteqqinneqarsinnaanissaannik kissaatigisaqarneq tunngavigalugu matumani Piginnaangorsaaqqinnissamut ikiorsiisarneq pillugu Inatsisartut peqqussutaat nr. 4, 31. maj 2001-imeersumut allannguutissatut siunnersuummik saqqummiussisoqarluni.

### 3. Pisortanut aningaasaqarnikkut allaffissornikkullu malitsigiumaakkat:

Piginnaangorsaaqqinnermi suliniarneq kissaatigisatut annertusiumaneqarneratigut pisortat aningaasartuutigisartagaat eqqarsaatigalugit aningaasanut inatsit malillugu pineqartumut annertussusilikkat qaangerneqassappata pisariaqassaaq kommunit pineqartoq pillugu aningaasartuutigisartagaannut atasumik apeqqutip kommuninut ataatsimut tapiissutaasartut pillugit isumaqatigiissusiortarnermut ilanngullugu oqallisigineqaqqittariaqarnissaa.

2006-imut aningaasanut inatsisissatut siunnersuummi piginnaangorsaaqqinnissamut ikiorsiisarnermut 3 mio. koruunit immikkoortinneqarput. Aningaasaliissutit pineqartut kommunini piginnaangorsaaqqinnermut aningaasartuutigisartakkat 50%-ii tikillugit matussuserneqarsinnaanerannut aningaasalersuutaassapput. Kommunit 2006-imut naatsorsuutigaat piginnaan-ngorsaaqqinnermut aningaasartuutigisartakkat marloriaataat sinnerlugit qaffakkumaartut.

Kommunit piginnaangorsaaqqinnissamut ikiorsiissutinut aningaasartuutigisartagaasa 2006-imi taama annertutigisumik qaffariaateqarnissaat nalilerneqarpoq piviusorsior tumik tunngavissaqanngitsoq. Inuussutissarsiornermut, Nunalerinermut Suliffeqarnermullu Pisortaqrarfiup naatsorsuutigaa piginnaangorsaaqqinnissamut ikiorsiissutinut aningaasartuutaasareersut 2006-imi marloriaataat sinnernaviannngikkaat. Taamaattumik 2006-imut aningaasanut inatsisissatut siunnersuut malillugu 3 mio. koruuninik aningaasaliissuteqartoqarnissaa naammassarinarinneqarpoq. Kommunit piginnaangorsaaqqinnermi 2006-ip ingerlanerani suliniarnerisa annertussusiat apeqqutaatillugu pisariaqalersinnaassaaq 2007-imut aningaasaliissutigiumasat annertusineqartariaqarsinnaanerat. Annertusineqarsinnaanissaannut aningaasaliussassat siusinaartumik soraarnerussutisiaqalersimasut ikilinerisigut aammalu pisortanit ikiorsiissutit pillugit peqqussut malillugu pisartagaqartut ikilinerisigut pissarsiassaasinaassapput, pineqartut piginnaangorsaaqqinnermi suliniarnerup annertusineratigut taaneqareersut naatsorsuutigineqarsinnaassammata.

Piginnaangorsaaqqinnermi suliniarnerup annertusinera kommunit aamma Namminersornerullutik Oqartussat piginnaangorsaaqqinnermut atatillugu aningaasartuutigisartagaasa annertusinissaannik malitseqaannartussaannngilaq. Amerlanerusut piginnaangorsaaqqinnerminnik iluatsitsilluartut ilutigitillugit pisortat isumaginninnikkut aningaasartuutigisartagaat piffissaq ungasinnerusoq eqqarsaatigalugu appassapput amerlanerusut suliffeqarnermi akuullualersussaassammata.

Piginnaangorsaaqqinnissamut ikiorsiissutit pillugit siunnersuut suliffeqarnermi pisortanut atatillugu immiini allannguuteqarfiunaviangilaq, tamatumani kommunit aamma Namminersornerullutik Oqartussat akornanni aningaasartuutunik agguaasseriaaseq allannguuteqarnaviangimmat.

Naatsorsuutigineqarpoq siunnersuutip malitsigiumaaraa kommunini pineqartut pillugit allaffissornikkut pisariinnerusumik ingerlatsisinnaasoqalernissaa. Kissaatiginartuuvorlu suliffissarsiorlutik kommunimut saaffiginnittut pineqartillugit kommuninit piginnaangorsaaqqissinnaanerit tunngavigalugu naliliiffigineqartarumaartut. Pissusissamisooruussaarlu isumaginninnermut ingerlatsiviit aamma suliffissarsiuussisarfiit piginnaangorsaaqqinneq pillugu suleqatigiippata.

#### 4. Inuussutissarsiutunik ingerlataqartunut aningaasaqarnikkut allaffissornikkullu malitsigiumaakkat:

Siunniussaangilaq inuussutissarsiutunik ingerlataqartunut aningaaqarnikkut malitseqarfiunissaa. Allaffissornikkut malitsigiumaakkat eqqarsaatigalugit siunniunneqarpoq nalunaarusiortoqassasoq siunertaralugu suliffeqarfiit piginnaangorsaaqqittunik sulisoqartut allaffissornikkut pisariillisaaffigineqarsinnaanissaat.

#### 5. Avatangiisitigut aamma pinngortitamut malitsigiumaakkat:

Siunnersuut malillugu avatangiisitigut imaluunniit pinngortitamut sunniuteqartitsisoqarnaviangilaq.

#### 6. Innuttaasunut allaffissornikkut malitsigiumaakkat:

Siunnersuut malillugu innuttaasunut allaffissornikkut sunniuteqartitsisoqarnaviangilaq.

#### 7. Naalagaaffeqatigiinnermut aamma Namminersornissamut tunngassuteqartut:

Siunnersuut malillugu Naalagaaffeqatigiinnermut atatillugu sunniuteqartoqartitsisoqarnaviangitsoq nalilerneqarpoq.

Siunnersuut Namminersornissamut atatillugu Naalakkersuisut aamma Inatsisartut sapinngisamik amerlanerpaat imminnut pilersorsinnaanissaannik anguniagaqarnerannut naapertuuppoq.

#### 8. Pisortat oqartussaasuinut kattuffinnullu tusarniaaneq:

Siunnersuut saqqummiunneqartinnagu missingusiaq tusarniaassutigineqarnikuuvoq Ilaqutariinnermut Pisorta qarfirmut, Akileraartarnermut Pisorta qarfirmut, Aningaasaqarnermut Pisorta qarfirmut, Peqqinnissamut Pisorta qarfirmut, Kultureqarnermut, Ilinniartitaanermut, Ilisimatusarnermut Ilageeqarnermullu Pisorta qarfirmut, KANUKOKA-mut, SIK-mut, Sulisitsisut Peqatigiiffiannut, ILIK-mut aamma NUSUKA-mut.

Akileraartarnermut Pisorta qarfik, Ilaqutariinnermut Pisorta qarfik aamma ILIK allannguutissatut siunnersuummut pineqartumut oqaaseqaateqanngillat.

Aningaasaqarnermut Pisorta qarfiup kissaatigaa § 1, nr. 1 malillugu inuttut nutaamik ineriartorfiusussat pillugit taasat qanoq aaqqissuunneqarnerannik aningaasalersorneqarnissaannillu nassuiaasoqassasoq. Tassunga atatillugu malugeqquneqarpoq peqqussut matumani pineqartoq malillugu ikiorserneqartussat tassaajumaarmata pisortanit ikiorsiissutit pillugit peqqussut imaluunniit siusinaartumik soraarnerussutisiallit pillugit peqqussut malillugit pisartagaqartut. Taamaattoqarpallu taamatut ikiorserneqartartut ikilissapput allatut aaqqissuussamut nuukkunik.

Sulianut allanut ilinniarnermut ilinniartitaanermullu tunngatillugu piginnaangorsaqqittut piginnaangorsaaqqinnissamut ikiorsiissutinik pisartagaqalersinnaanissaannik qaqugulu ilinniagaqarner siuteqarsinnaalernissaanik nassuiaasiornissaq Aningaasaqarnermut Pisorta qarfiup ujartorjaa. Ilinniagaqarner siutit nalinginnaasumik neqeroorutigineqarsinnaalersarput ilinniarneq aallartinneqaraangat. Piginnaangorsaaqqinniarnermi ilinniartitaanermut tunngatillugu pineqarpoq piginnaangorsaqqittussaq ilinniartitaanerup aallartinnissaanut ilinniagassanik ataasiakkaanik amigaateqarner soq, imaalillugu ilinniartitaanerup aallartinnissaanut piginnaangorsaaqartariaqarner soq piareersaaqartariaqarner sorluunniit.

Aammattaaq Aningaasaqarnermut Pisorta qarfiup kissaatigaa aningaasatigut malitsigisassat siunnersuutip nassatarisassai ilanngullugit suliarineqassasut, piginnaangorsaqqittussap suliffeqarfinni namminersortuni pisortalluunniit pigisaanni sungiusarnissamik ilinniarnissamilluunniit neqeroorfigineqarsinnaanerani pissutsinik immikkut ittunik soqarner soq apeqqutaajunnaarsillugu. Tassunga tunngatillugu oqaatigineqassaaq piginnaangorsaaqqinniarnermut aningaasanik amerlanerusunik atugassiinissaq pisariaqalersinnaanersooq, pingaartinneqartariaqarporli piginnaangorsaaqqinniakkat amerlanerulernissaat pisortanit ikiorsiissutit pillugit peqqussut malillugu pisartagallit siusinaartumillu soraarnerussutisiallit ikilisinneqarnerannik kinguneqassanersooq.

Piginnaangorsaaqqinniarnermi nalinginnaasumik piffissaliussap sivikillisinnissaa aalajangersimasumilluunniit piffissamik killiliisoqarnissaa Sulisitsisut Peqatigiiffiata pissusissamisoorsorinngilaa. Piffissamik killiliussa q ukiunut marlunnnut aalajangerneqarsimappat piginnaangorsaaqqinniakkap pisartagaqarluni ilinniarnini naammassisinnaanavianngilaa. Sulisitsisut Peqatigiiffiata innersuussutigaa piffissap piginnaangorsaaqqinniarfiusup sivisussusia piginnaangorsaaqqinniarnermik pilersaarummut naleqqussarneqassasoq tamannalu pilersaarummi

aalajangerneqassasoq. Tasunnga tunngatillugu oqaatigineqarsinnaavoq ilinniarneq sivilunerussappat piginnaangorsaaqqitsinniagaq ilinniagaqarnersiuteqarsinnaalissamat taamaattumillu piginnaangorsaaqqinniarneq pillugu peqqussummit ilaatinneqarunnaassalluni.

KANUKOKA-p oqaatigaa kommuninit arfiniliusunit ataatsimut isumaqartoqartoq piffissap piginnaangorsaaqqinniarniusup sivilusussusia ukiunit tallimaniit marlunnut sivilkillineqarnissaa ajunngitsuusoq, kommunilli ataasiakkaat kissaatigigaat innarluutillit anniaatillilu piginnaangorsaaqqitsinniarnerat ukiunik marlunnik sivilunerussannginnera pingaartinneqassasoq. Innarluutillit allallu anniaatillit peqqussummi § 10, imm. 2-mi eqqarsaatigineqarput.

Piffissap piginnaangorsaaqqinniarniusup sivilkillisinnissaa Ammassallip Kommuniata eqqarsarnartoqartinnerarpaa Ammassallip Kommuniata annilaangassutigimmagu immikkut akuersinissamik maleruagassaq ilaatinneqannginnerminngarnit maleruagassaanerulissasoq. Malugeqquneqarpoq kommunit missingersuuteqarmata maleruarneqartussamik aammalu immikkut akuerineqarnissamik periarfissaqanngitsoq taamaattumillu ilanngunneqannginnissaq erseqqissaatigisariaqartoq.

Sulisitsisup Peqatigiiffiata oqaatigaa eqaannerusumik suliffeqarnerup piffissamik killiliiffiginissaa iluaqutaanaviangitsoq eqaannerusumik suliffeqarneq inunnut nalinginnaasumik atugassaqartitaalluni suliffeqalersinnaanermut ataavartumillu suliffeqalersinnaasunut tunngatinneqartarmat. Sulisitsisut Peqatigiiffiata innersuussutigaa tamatumunnga taarsiullugu aalajangersakkamik ilanngussisoqassasoq imatut oqaasertalimmik akissarsiatigut tapiissutinut aningaasaliissut annerpaamik ukioq ilivitsukkaarlugu tunniunneqartassasoq. Oqaaseqaatit siunnersuummut ilanngullugit suliarineqarput.

KANUKOKA-p kissaatigaa kommunit aningaasartuutaasa utertittarneranni periaatsit pisariillisinnessaat sulissutigineqassasoq. Periaaseq pisariillisinneqarsinnaanersoq maanna misissorneqaleruttorpoq. Kommunip tamarmiusup qinnuteqaateqariaasia ataasiinnarmik sammiveqartinneqalissaaq tamannalu allaffissornikkut oqiliallaatigineqassalluni.

KANUKOKA-p aamma maluginiaquaa naatsorsuutigineqarmat ilitsersuutit peqqussummut attuumassutillit kiisalu nalunaarutissaq siunnersuutip atuutilersinnissaa sioqqullugu piffissaatillugu suliarineqarsimammata. Nalunaarutit peqqusutip atuutilinnginnerani suliarineqassapput. Peqqussummut ilitsersuummut tunngatillugu piginnaangorsaaqqinniarneq pillugu peqqussummut ilitsersuummik peqareerpoq taannalu peqqusutissap atuutilinnginnerani piginnaangorsaaqqinnissamat ikiorsiissutit pillugit peqqusutip allannguutaa naapertorlugu naleqqussarneqassalluni.

**Peqqusutissatut siunnersuummi aalajangersakkanut ataasiakkaanut  
oqaaseqaatit**

## § 1-mut

### Nr. 1-mut

Suliniutissat periarfissat saniatigut siunnersuutigineqarpoq piginnaangorsaaqqinniagaq piffissap piginnaangorsaaqqinniarfiusup nalaani inuttut ineriartortitsinernut peqataanissamut periarfissinneqassasoq. Kommunit oqaloqatiginnittarnerit aqputigalugit paasiniarumasarpaat inuttut suut ineriartorfissat piginnaangorsaaqqinniakkap atorfissaqartinnerai. Ilinniagaqarnissamut piukkunnarsaanermut suliniutit tassaasinnaapput ilinniagassat qinnuteqaateqartup sanngiiffiginerpaasaasa pikkorissarfigineqarnissaat, qinnuteqaateqartup ilinniagassat aallartinnissaannut kingorna pisinnaasaqarfigiligassai.

Inuussutissarsiutinut piukkunnarsaatissat tassaasinnaapput sivikinnerusumik suliffeqarfimmiinnerit; qinnuteqaateqartoq sulilernissamut piareersarumallugu.

Inuttut ineriartortitsiniutit tassaapput pikkorissarnerit inuttut ineriartorfiusussat. Kommunit ilaat tassunga tunngaasunik misilittaateqareerput paasineqarsinnaasimavorlu amerlanerit suliffittaartarsimasut namminnerlu akisusaaffimmik tigusaqarsinnaalersimasut. Pikkorissartitsisarnerit imaalillugit aaqqissuussaapput qinnuteqaateqartut anersaakkut ineriartortillugit suliffik ilinniakkalluunnit naammassinissaa isumagisinnaangorlugu.

### Nr. 2-mut

Piginnaangorsaaqqissinnaaneq sioqqullugu qulaajagassat pillugit maleruagassat erseqqinnerusut nalunaarut aqputigalugu Naalakkersuisunit aalajangersarneqarsinnaapput.

Kommunit piginnaangorsaaqqissinnaaneq pillugu suliaat assigiiaarnerulersikkumallugit nalunaarummi pineqarsinnaapput piffissami qulaajaanerup nalaani suliniutissat suunissaannik nassuiaatit erseqqinnerusut, ilanngullugit suliniutit inuttut ineriartornissamut tunngasut suliniutillu inuussutissarsiutinut piukkunnarsaatit.

### Nr. 3-mut

Aalajangersagaq ilanngunneqassaaq piffissami piginnaangorsaaqqinniarnermi pineqartup ilinnialersinnaanerata erseqqinnerulersinnissaa siunertaralugu, ilanngullugu allamik ilinniagaqalersinnaaneq. Tamanna pissutaaqataassaaq pineqartup suliffimmiiginnarnissaa sulilersinnaalernissaaluunniit. Allamik ilinniagaqalerneq pineqartunut amerlasuutigut tunngaviussaaq suliffissanut sulilersinnaanissamut.

### Nr. 4-mut

Siunnersuut aqputigalugu pissutsit immikkut ittut atorunnaassapput piginnaangorsaaqqinniagaq suliffeqarfinni namminersortuni pisortanilluunniit pigineqartuni sungiusarnermik ilinniarnisamilluunniit neqeroorfigineqarsinnaalernissaanut akissarsiatigut tapiissuteqartitsiviusumik. Tassa neqeroorummi pineqarput piginnaangorsaaqqinniakkat tamarmik. Aalajangersakkami atuuttumi mattunneqarput inuit suliffeqarnermut attuumassuteqarsimangitsut imaluunniit aapparissamik qitornarisanilluunniit pilersuinissamik pisussaaffeqangitsut - suliffeqarfinni piginnaangorsaaqqinniarnissaq pillugu neqeroorfigineqarnissamit. Taamatut killiliinneq aammattaaq atorunnaarsinneqarpoq.

#### Nr. 5 aamma 6-imut

Piginnaangorsaaqqinnissamut ikiorsiissutit pillugit Inatsisartut peqqussutaanni § 10, imm. 1 naapertorlugu piffissaq piginnaangorsaaqqinniarfiusoq tunngaviatigut ukiunit tallimanit sivisunerusinnaangilaq. Siunnersuutigineqarpoq piffissaq piginnaangorsaaqqinniarfiusoq allanngortinneqassasoq ukiunut marlunnut piginnaangorsaaqqinniarneq "ilatsiinnarfiulissanngimmat". Piffissaq sivikinnerusoq atoraanni piginnaangorsaaqqinniarnermut suliniarneq iliuseqarnissamut samminerulersinneqassaaq, soorunalumi pineqartunut ataasiakkaanut malinnaatitsissutitut suliniuteqarfiusumik.

Aalajangersagarli periarfissiivoq ukiunit marlunnit sivitsuinissamut, pissutsit immikkut ittut atuutsillugit. Pineqartut ilaannut ilaasinnaavoq naatsorsuutigineqalissasoq piginnaangorsaaqqinniarneqarneq ukiunit marlunnit sivisunerussasoq taakku suliffeqarfinni sulisinnaalernissaanut ilinnialersinnaalernissaannulluunniit piukkunnarsisillugit. Kommuni naammineq aalajangissavaa taakkuninnga oqaloqateqartareernikkut pissutsit immikkut ittut taakkununga atuunnersut, ilanngullugit inuttut, peqqisutsikkut inuuniarnikkulluunniit pissutsit immikkut ittut pisariaqalersissimaneraat ukiut marluk sinnerlugit sivitsuisoqassanersoq.

#### Nr. 7-imut.

Kommuni akissarsianut tapiissutinut aningaasaliinissaanut tunngatillugu annerpaamik ukiumut ataasiakkaartumik tunniussisoqartassaaq pineqartoq taamaallaat ukiumut ataatsimut qulakkeeriffigalugu. Taamaattorli pineqartoq, kommunip - eqaannerusumik suliffimmut tapiissutit pillugit immikkut ittumik pisoqartillugu - sukumiisumik nalileereerneratigut, sivitsorneqarsinnaalluni. Mississorneqassaaq atugassarititaasut nalinginnaasut atorlugit piginnaangorsaaqqinnissaq aqputigalugu suliffissaqalernissamut periarfissaqarnermoq, suliffik eqaannerusoq neqeroorutigineqalersinnagu.

Eqaannerusumik suliffilittut tapiissutisisartut naliliiffiginissaat kommuninut pisariaqarsinnaasassaaq, ilanngullugu aalajangerneqarsinnaangorlugu piffissaq ukioq ataaseq sinnerlugu sivitsuisoqassanersoq. Tamanna pillugu aalajangersakkat



sukumiinerusut nalunaarummi aalajangersarneqassapput Inatsisartut peqqussutaani § 17-imi inatsisitigut tunngavilimmik atuutilersumi.

*§ 2-mut*

Siunnersuutigineqarpoq peqqussut ulloq 1. juli 2006-mi atuutilissasoq.